

## TORITENY - ALAHADY faha-30 TSOTRA - TAONA D



***Andriamanitra ô, mamindrà fo amiko fa mpanota aho!***

Ry Kristianina havana, efa manakaiky tokoa ny fankalazana ny Sinaody. Araka ny efa nasongadintsika dia atolotry ny Eglizy amin'ny alalan'ny vakiteny fandalinana ny mikasika ny finoana sy vavaka. Ireo ihany koa no fototra ny dinika ataontsika amin'izao Sinaody izao. Manampy antsika amin'ny fiarahan-dia ataontsika miroso amin'ny Sinaody izany. Isaorana Andriamanitra. Anjarantsika ny manararaotra mikatroka amin'ny dinika ataontsika, amin'ny fifampitraohofana iarahantsika manao.

Izao Alahady faha-30 mandavantaona izao sady amin'izao volana Rozery izao no iarahantsika mitalaho amin'i Masina Maria ireo fahasoavana maro samy hafa mba hahatonga antsika ho tabernakla velona mpamafy famindram-po tahaka azy eo amin'ny fiainantsika andavanandro. Efa nohazavaintsika koa rahateo ny mikasika ny fivavahana, marina mila mivavaka isika ary

***Vakiteny I : Ekl. 35, 15b-17. 20-22a***

***Salamo : Sal. 33***

***Vakiteny II : 2 Tim. 4, 6. 8. 16-18***

***Evanjely : Lk. 18, 9-14***

mila an'izay fahasoavan'Andriamanitra izay fa ny marina ihany koa dia Andriamanitra mila antsika mba handray ny sitrapony ka afaka hizara ny sitrapony eo amin'ny mpiara-belona. Ny sitrapon'Andriamanitra dia ny hahasambatra antsika, hahatsara ary hahazantsika mifanasoa eo amin'ny fiainantsika andavanandro. Io no nataon'i Masina Maria tamin'ny

fiainany izay banjinintsika mandritra ny volana oktobra izao mba hanampy antsika ho tonga fitaovan'Andriamanitra, ho TABERNAKLA VELONA ka hitondra an'i Jesoa ilay famindrampon'Andriamanitra fa indrindra amin'izao ezaka ataontsika amin'ny Sinaody izao.

Efa mamaramparana ny dingana voalohany isika ary maniry hametraka ny TOROLALANA PASTORALY na DIRECTOIRE PASTORAL MIKASIKA NY VAVAKA SY FINOANA ETO ANIVON'NY DIOSEZY hahatonga antsika ho EGLIZY OLO VELONA VELOMIN'NY BATEMY MIARA-DALANA MIOMBONA MANDRAY AN-TANANA KA ZARY MISIONERA TABERNKALA VELONA. Tsy irery tokoa isika amin'izany fa miaraka amin'i Masina Maria mba hanamasina ny fiainantsika. Masina ny fiainantsika raha eo anivontsika Andriamanitra ary raha eo anivontsika izy dia mpamafy famindram-po isika ka lavitra eo anivon'ny fiaraha-monina misy antsika sy ny fianakaviansika ireny herisetra ireny sy hetraketraka vokatry ny fitiavan-tena, fialonana ireny fa manjaka kosa ilay fitiava-namana ao anatin'ny fo madio tahaka an'i Masina Maria ka alaintsika tahaka koa eo amin'ny fiainantsika. Izay indrindra ry Kristianina havana ny hafatra tian'ny Eglizy ampitaina amintsika amin'izao Alahady faha-30 mandavantaona izao ka hibanjantsika indray ny vavaka. Tsy misy anefa ny vavaka raha tsy eo ny finoana

**Ahoana ny hahatonga ny vavaka ho fiainantsika ?** Ny tenin'Andriamanitra androany milaza fa "ho henoim-bavaka izay manetry tena". Izay ny toetra tena ilain'ny mpivavaka rehetra ary hitantsika ao amin'i Masina Maria izany. Io no toe-panahy tsy maintsy hivelomantsika amin'ny fiainantsika andavanandro : mba hahatonga ny vavaka ho fiainana ary ny fiainana ho vavaka dia mila fanetren-tena isika. Tsy maintsy volena io toetra io satria araka ny hitantsika ny tontolo manodidina antsika manosika amin'ny fieboeboana, fireharehana, mihevitra ho mahavita tena...

**Inona moa no atao hoe fanetren-tena ?** Ny fanoharana nataon'i Jesoa ao amin'ny Evanjely androany no aoka ho raisintsika. Araky ny voalazany dia nisy roa lahy niakatra nivavaka ; ny Farisianina izay fantantsika ny toetrany izay mihevi-tena efa mahalala sy mahavita ny fandalinana rehetra. Io no toetra matetika mahavao antsika, fakam-panahy manjo antsika, ohatra amin'izany ny filazana hoe vita batemy, kominio voalohany, konfirmasio, mariazy izany hoe vita raha jiaby. Io no toetran'ny Farisianina hitantsika eo izay misaotra an'Andriamanitra izy fa niaina sy nivelona an'izay fampianarana izay araky ny lalàna sy fepetra nefa ety ivelany ihany izany fa tsy ny fo no manao azy ary indrisy aza noho izay hoe ety ivelany no asongadina dia milaza izy fa tsy tahaka an'ilay Poblekanina izay tsy mifady hanina, manana toetra tsy mendrika izany hoe mitsara olona ilay Farisianina. Fantantsika fa tsy izay tanterahintsika ety ivelany fotsiny mety fihatsaram-belatsihy izay fa ny fontsika no tena jeren'Andriamanitra ary dia henontsika teo fa ilay Poblekana nanetry tena ary nitalaho ny famindram-pon'Andriamanitra ka nohavaozin'Andriamanitra ny fony ka nanatanteraka ny sitrak'Andriamanitra izy.

**Inona no tena zava-dehibe tian'i Jesoa ambara amintsika avy amin'io fanoharana?**

Tsy ny fanatanterahana ny lalàna no tena zava-dehibe, ilaina dia ilaina izany, aoka koa ry Kristianina havana tsy handiso isika ka hilaza fa nandrara an'izany ny fampianarana atao izao

ka hoe tsy ilaina intsony ny fanatanterahana ny didy folo. Ilaina ny fanatanterahana azy ireny fa mila avy ao anatin'ny fo ka manova ny fiainantsika. Raha manatanteraka tokoa ny batemy noraisintsika isika dia avy ao anatin'ny fo izany, ary raha manatanteraka ny sakramentan'ny mariazy izay noraisintsika isika dia avy ao anatin'ny fo no iainana azy ka zary fianakaviana Eglizy kely misy an'Andriamanitra ny fiainan'ny fianakaviana misy antsika ka miova tokoa ny fiainantsika; miova ny fiaraha-monina. Raha pretra isika, raha voatokana isika dia aoka ho toe-piainana mifanaraka amin'izany no fiainantsika.

Raha manatanteraka ny didy folo isika dia tsy misy intsony ny herisetra ary mifanaja isika ka miova ho tsara ny fiainantsika. Izay ny tanjona tian'i Jesoa lazaina eto fa tsy hoe ratsy ny fanatanterahana ny didin'Andriamanitra na koa hoe tsy ilaina ny vita batemy na vita mariazy, sanatria izany.

Ny tadiavin'i Jesoa dia avy ao anatintsika ao no hanatanterahintsika azy fa tsy ho voan'ny henamaso na fihatsaram-belatsihy fa ao anaty fanetren-tena tanteraka no entintsika mivelona ny finoantsika eo amin'ny fiaraha-monina misy antsika. Azontsika honogna fa lavitra amin'ilay toe-tsaina mitady hanjaka ankehetriny : Tsy ny tany no fady fa ny vavam-bahoaka izany hoe rehefa tsy hitan'ny olona dia manao izay saim-pantany ary indrisy mifanohitra amin'ny maha anao anao... Toe-tsaina mitady hanjaka io ka mila resena fa indrindra isika manatanteraka izao sinaody izao. Toe-po mifanohitra amin'ny vavaka io toe-po io.

Izay no ambaran'ny vakiteny voalohany amin'ny alalan'ny bokin'ny Siraka : *rehefa isika tokoa no mivavaka dia mihaino antsika Andriamanitra satria mahalala ny fontsika izy*. Ray izy ka mahalala ny fontsika manontolo, tsy mijery ny zavatra ataontsika izy, tsy mizaha tavan'olona izy fa ny fontsika no jereny ary ny fo feno antra, tahaka an'i Masina Maria feno fanetren-tena. Diovin'Andriamanitra mandrakariva ny fontsika raha ekentsika ny mandray azy.

### **Ahoana ny fomba hanadiovan'Andriamanitra ny fontsika ?**

Raha ny marimarina kokoa miditra ao amin'ny fiainantsika Andriamanitra rehefa mihaino tenin'Andriamanitra isika, raha mametraka Azy eo anivon'ny fiainantsika sy ivon'ny fiainantsika. Io no ezaka ataontsika amin'izao Sinaody izao. Izay ny finoana ka manatanteraka ny sitrapon'Andriamanitra isika amin'izay. Raha mihaino ny tenin'Andriamanitra isika dia io no manadio ny fiainantsika. Nataon'i Masina Maria izany ary amin'izao volana oktobra, volan'ny Rôzery, izao dia izy no modely ho antsika ary maniraka antsika tahaka ny voalaza ao amin'ny bokin'ny Siraka : amin'izay dia Andriamanitra mitantana antsika ka hanatsara ny fiainantsika.

Voalaza koa izany ao amin'ny vakiteny faharoa taratatin'i Md Paoly, hafatra nataony tamin'i Timote zanany ka toa miteny amintsika koa izy miainga amin'ny experience niainy: rehefa

tanteraka tokoa izay fanetren-tena izay ka miombona amin'Andriamanitra isika, na inona miseho na inona mety mitranga dia vonona mandrakariva ny mpanetry tena amin'Andriamanitra sy ny mpivavak'Andriamanitra ary ny manatanteraka ny sitrak'Andriamanitra ka afaka hilaza tahaka an'i Md Paoly amin'i Timote : *“Izaho dia mova tsy efa haîdina ho fanatitra sahady, ary efa antomotra ny andro hialako. Niady ny ady tsara aho”* izany hoe niatrika an'izany fiainana izany ka nodiovin'Andriamanitra ny fo ary rehefa voadion'Andriamanitra ka vonona tokoa dia afaka miroso amin'izay fitsaran'Andriamanitra dia ilay fitsarana voalazan'i Siraka. Voalazan'i Md Paoly koa fa tsy nisy nanampy azy fa niatrika an'izany izy ka na dia eo aza ny tsy fanampian'olona dia afaka amin'ny asa ratsy rehetra izy noho ny fahasoavan'Andriamanitra *“Hamonjy ahy ny Tompo”*. Izany tokoa ny fanantenantsika.

Ary azo lazaina fa efa mampiditra antsika tsikelikely ireo tenin'Andriamanitra androany ireo amin'ny fankalazana ny ny voalohany sy faharoan'ny novambra izay hahatsiarovantsika ireo izay efa nialoha làlana antsika. Raha mankalaza an'ireo efa nialoha làlana isika dia mahatsiaro ny fiafaran'izao tontolo izao.

Io no voalaza teo am-piandohana fa miditra tsikelikely amin'ny fankalazana ny tapany voalohany amin'ny Sinaody faha-7 isika izay tanterahantsika mandritra ny ny fankalazana an'i Kristy mpanjaka. Ka ireo vakiteny androany dia mampiditra antsika bebe kokoa amin'ny maha-mpivavaka sy maha-Kristianina antsika : mampiombona ny fiainantsika amin'i Jesoa izay mitaky ny toe-panahy manokana dia ny fanetren-tena. Io no hihainoan'Andriamanitra ny vavaka ataontsika. Andriamanitra miditra ao am-pontsika ka manjaka ao ary mitondra antsika amin'ny tena fiainana ny maha-zanak'Andriamanitra hahazoantsika ny tena fahasoavana marina.

Ry Jesoa Tompo ô aza avela hanana ny toe-panahy voalazanao amin'ny fanoharana izahay, izany hoe ny toe-panahy farisianina, fa aoka izahay hanaiky ny tsy fahamendrehany tahaka nataon'i poblikana mahantra sy malemy izahay miatrika izao fiainana izao. Ianao no fahasoavana mankahery anay ka enga anie hodiovinao tokoa ny fonay, ho tsotra ny fiainanay ka zary ho famantaram-pamonjena ho an'ireo manodidina anay, ho mpamafy fanantenana sy fitiavana izahay, hiova ny fiainanay ka hiadam-pinaritra ao aminao. Masina Maria Reny Be fitiavana, ampianaro izahay hanana fanetren-tena tahaka anao, hahay hihaino ny Tenin'Andriamanitra, hifampihaino amin'izao sinaody izao ka hanana toe-panahy tia vavaka. Md Josefa, ampianaro ny fianakaviana eglizy kely mba hanana toe-po tia vavaka ary vonona mandrakariva handalina finoana. Amen

Mompera Arseveka Mgr Benjamin Ramaroson